



یسوایب آمدرو، یهودای تکھیاناو

Yasuu'iib umadarwa, Yahuudaay tukhayaanaawwa

01 اَفْتِیرِے اید، «أباسکا» ایدنتہ اِدولہووب،  
02 اَفْتِیرِیۃ ہداوۃ، وھَقے کناایقاوۃ، اودھی اریکونۃ سببے  
یسو اُہای ایدرنتہ سیکۃ بھرونتہ۔

01 Ufatiiri iid, «Ubaaskaa» iidna idwilhoob,  
02 ifagiiriya had'aawwa, whaggi kanaaniigaawwa,  
oodehay iriikwna sabbii masi Yasuu'a haay idiirna  
sikka yhiriwna.

03 اُوبلیس «اِسکارِیوتے» ایدنتہ یهوداس شومیتہ۔ بزوہ یسوی اِ  
اِکُورِباتی اِتمنتہ مَلوینب ہوی قالو۔

03 Uubliis «W'iskaaryuuti» iidna Yahuudaas  
shuumiya. Baruuh Yasuu'ii Ikwiriyaatay itamna  
maloooyeb hooy gaalu.

04 اَفْتِیرِیۃ ہداوۃ، اُکواسنای قوے اِفواَدیقاوۃ، یسوا کک برتِیوہ  
دہای نُونیب اِنفراد۔

04 Ifagiiriya had'aawwa, Ukwaasanaay gawi  
igw'aadiigaawwa, Yasuu'a kak bareeyooh dehaay  
nuuniyeeb infaraad.

05 براه ونیت اِمڈنیت، بزوہ اِمہلقین نات اِپیونۃ دہای  
تافقسَمیان۔

05 Baraah winneet imdhadhniit, barooh imhallagaayee  
naat iiywnee dehaay taafagsamiyaan.

06 بزوہ اُون اوتفاق ہوی ڈیبایت، یسوا اودھی بارہی ہای برتِیہ  
نُونیب فُرسۃ اِفواَد۔

06 Baruuh oon ootfaag hooy dhibiyaayt, Yasuu'a  
uudehay baarhay haay bareeh nuuniyeet fursa igw'ad.

07 اَفْتِیرِے اید دایای اِیتہ، اُون وھواد «أباسکای» ایدیب اُوریو  
ہوی اِمہرید۔  
08 بینہووب یسوا بترسوۃ، یوہناوۃ لبقوۃ، «دِفات وایدے دہای  
اُودرار دھون سوْمرنۃ» اِدے۔

07 Ufatiiri iid daayaay eeya, oon whawaad  
«Ubaaskaay» iidiib uureew hooy imhariid.  
08 Beenhoob Yasuu'a Bitruswa, Yuuhannaawwa  
linguuya, «Difnaat w'idi dehaay oodiraar dehoon  
soomirna!» idi.

09 بزوہ سگنایان، «نا مہین دھوک نِسومیرنیت ہرِیوۃ؟» اِیدین۔

09 Barooh sakanaayaan, «Naa mhiin dehook  
nisoomiireet harriwa?» idiin.

10 یسوا، «اُورشلیم اَلُدس شومنتینۃ دُور، تک یمے قِدر اِتْقِیبک  
تَمِرنتہ۔ بزوہ اُوقو اِشومینیب شیبنتہ۔

10 Yasuu'a, «Oorshaliim Algudis shuumteena door,  
tak yami gidir itfayik timeerna. Baruuh oogaw  
ishuumiiniyeeb shibibna!

11 بین اُوقوے کنتہ بینات، «سِیدنتہ، اُودرار اُباسکای تِگُورِیاتِیو قُود  
کنتہ قُوب تَمَنے؟ اِدھوکۃ دینتہ۔

11 Been ugawi kina beenaat, «Seedna, oodraar  
ubaaskaay tikwiriyaatiyu gwad keeya gawiib tamani?  
idihooka» diina!

12 بزوہ اُوقوے مہکول شَفَت مرأت فرَشَمات رِہسِھوکتہ اِندے، بین  
اُومہین سوْمرنۃ» اِدے۔

12 Baruuh ugawi mhakwal shafat mar'at farrashamaat  
rhisihookna indi, been oomhiin soomirna!» idi.

13 براه اِدِفتہ، یسوا اِیدناتیت اِمرین۔ بین توی اُباسکای اِرار  
اِسومرنۃ۔

13 Baraah idifna, Yasuu'a iideenaatiit imriin. Been  
tooy ubaaskaay diraar isoomirna.

اُودرار

Oodiraar

14 اِدرارے دُور اِنبِہووب، یسوا اِلنقومِیایۃ قُود، تُماریتے دہای  
اِسأ۔

14 Udiraari door eeyanhoob, Yasuu'a ilinguumiyaaya  
gwad, tum'ariiti dehaay is'a.

15 اُنے بَرِیوکتہ قِیب اُون اُباسکای اِرار کک دایب  
بالہمی تَمینت اَرین۔

15 Yasuu'a, «Ani bareeyookna geeb oon ubaaskaay  
diraar kak daayib baalhamay tamiyeet areeyan.

16 اُنے اِندھوکتہ، شاوٹے اُونای ہرِی اُباسکای اِرار اُکواسناتیت  
ہدائینیب اِکتیب اُویک تَمے کادے» اِدے۔

16 Ani andihookna, shaawti oonaay har'ii ubaaskaay  
diraar Ukwaasanaayt had'aayetiib ikatiyeeb ookiik  
tami kaadi.» idi.

17 کاس اِیہایت، اُکواسنتہ یہمد۔ ملباب، «اُون اُکاس اُہانات  
اِبکتیبوکتہ اُڈنتہ۔

17 Kaas iyyhaayt, Ukwaasana yhamid. Malyaab, «Oon  
ookaas ahaanaat ibitkeyookna adhidhna!

18 اُنے اِندھوکتہ، اُنے اُون اُکاس شاوٹے اُکواسناتیت ہدایے  
اِبکتیب اُویک کُفُوان» اِدے۔

18 Ani andihookna, ani oon ookaas shaawti  
Ukwaasanaayt had'aayi eetniyeeb ookiik kagw'an.»  
idi.

19 هَدِيْب يَكْسِيَايْت، اُكْوَاَسَنَة يَهْمَد۔ قِي يَهْدُو َع اِكْتَاَت بَرِيَه نُونِيَه۔ مَلِيَاَب، «اَنِي اُبَشَارِي بَرِيِيُوَكْنَة چَلَايِي َع اِيِيُو َع، تُوْن تُوْنَه اَنِيْت شَانِيِيْتِيْب دَايْنَه»۔ اِد َع۔

19 Hadhiib yaksiyaayt, Ukwaasana yhamid. Gay yhadhi ikt'at bareeh nuuniya. Malyaab, «Ani ubashari bareeyookna jillaayi ittiyeewi, toon toona aniit sh'anayteeb d'iina!» idi.

20 اُوْن تَايِيْتِيْت يَسُوْا كَاَسِ اُوْدِرَار َع هَرِي اِيِيَهَايْت، «اُوْن اُوْكَاس اُكْوَاَسَنَة اَقْلَد اِقْيِيْب اَنِيْب اُوْبُوِي بِيِيُوَه دَهَاي بَرِيِيُوَكْنَة چَلَاي اِيْتِيْف۔

20 Oon t'iiteet Yasuu'a kaas oodraari har'ii iyyhaayt, «Oon ookaas Ukwaasana ugalad igayiib aniib uubooy batiyooh dehaay bareeyookna jillaay eetfiif.

21 وَايِي َع اَنِيْب نُونِي َع اِنْدِيْب اَرِي، اُوْنْتَا ثَمَارِيْتِي َع كَهِي قِيُو اِيْفِي َع۔

21 W'ayi aneeb nuuni indiib aree, oont'a tum'ariiti kehii geebu eefi.

22 اَمَايِيُو اُدَهَاي كُتَاب يَايْنَهُوْب، وَاَدْمِي َع اُر اِيْكَي اِيَايِي َع۔ لَاكِيْن اِيْجُو اُوْتِك بَرُوَه نُونِيِيْب َع۔ اِد َع۔

22 Umb'eeyu udehaay kataab y'iinihoob, W'aadami Oor ibakii iyaayi. Laakiin idhikw uutak barooh nuuniiniib!» idi.

23 اِيْجُو رِيَايِي اُو بَرِيَسُوَه اِيْن سَكِي َع اِنْدِيْب تَكْتَاك سَكْنَايَاِن۔

23 Ikwiriyaatay aaw bareesooh een saki indiyeeb taktak sakanaayaan.

24 اُو وَنَكَاَب اِيْكَتِيْب اَمْفُوْسُوْرَة اِيِيْتِك دَايَه۔ 25 يَسُوْا بَرِيِيُوَه دَهَاي، «اُدَهِي َع هَدَا بَرِيِيُوَه كَهِي يَهْدَهْنَه، تَهْدَايِي َع اِيْرِيْن «دَايِيَه» اِيِيُو دِيْنِيْت اَرِيِيْن۔

24 Aaw winkaab iiktiyeeb amgwasaura eebtik daaya. 25 Yasuu'a bareeyooh dehaay, «Udehayi had'a bareeyooh kehii yhad'na, tehad'aayi ibariin <daayiiba> ittiyoodiineet areeyeen.

26 لَاكِيْن بَرَاكْنَه بَرِيَه تَايِيْتِيْب كِيْتِيَه۔ بَرِيْكَنَه اُو وَنَكَاَهُوَكْنَه اِنْدِيْس، وُهَدَاَهُوَكْنَه اِيْرُو شَقَامِيْنِي َع۔

26 Laakiin baraakna bareeh t'iiteeb kitteena. Bareekna uuwinkaahookna indiis, whad'aahookna eeraw shagaamiini.

27 اُو وَنَكَاَبُو؟ اَشَقَامِيْنِيْب هُن، اَشَقَامِيْنِيْب؟ بِيْن بَرُوَه ثَمَارِيْتِي َع دَهَاي سَا شَقَامِيْنِيْب كِيْكَي؟ لَاكِيْن اَنِي َع بَرِيِيُوَكْنَه قِيْب اَشَقَامِيْنِيْب اَتْنَا۔

27 Aaw winkaabu? Ushagaamamiiniib han, ushagaamiiniib? Been barooh tum'ariiti dehaay s'aa shagaamamiiniib kiiki? Laakiin ani bareeyookna geeb ishagaamiiniib atan'i.

28 بَرَاكْنَه اَنِيْب يَأْفُوْرَه كَسِيَه قُوْدُو هَسْتَاَنَه۔

28 Baraakna aniib y'angwirha kasseeh gwadu hassitaana.

29 اَنِيْب بَاَبُو هَاي هُوْكَوْمِيْتِي َع هَدَايِي َع بِيِيُوُو تْنَايِيْت، بَرِيْكَنَه هُن هَدَايِيْت، يَهْدَايِيْت هَاي تَهْكَوْمِيْنِيْت اِيِيَاو هُوَكْنَه اُنْد َع۔

29 Aneeb Baabu haay hukwimeet had'aayi yhiyeetu tunaatiit, bareekna han had'aayeet, yhad'aayeet haay tehankwiimneet iyaawhookna andi.

30 اَنِيْت تَهْدَايِيْتِيْب قِيُو قُرَاوَه، ثَمَاوَه تِيْدَنَه۔ بِيْن تُوِي قَالَكَه اِسْرَايِيْلَايِيْت سَايْت، اِسْرَايِيْلَايِيْت تَقِيْبَلَه تَيْمَنَه مَلُو هُوْكَوْم تِيْدَنَه»۔ اِد َع۔

30 Anit tehad'aayeetiib geebu gw'aawwa, tamaawwa tiyadna. Been tooy gaalka isuurkinaayt s'iit, Israa'iilaayeet tigabiila titamna malu hukwim tiyadna.» idi.

### يَسُوْا يَب اِيْجُو رِيَايِي جَرِيْمِي َع اِيِيْدَنَه

### Yasuu'iib ikwiriyaatay jarrabami eeyadna

31 يَسُوْا، «سِيْمُوْن، سِيْنَاكِر هِيْب۔ اُدْرَاكْتَنَه وَهَر َع اِيْبَاي اَسِيْنِيَايْت اُوْبِيْلِيْس بَرِيْكَنَه قَالَكَه جَرِيْبِيْت يَهْرُو۔

31 Yasuu'a, «Siimoon, sinaakiraheeb! Udir'aatkina wharri ibittaay waasiiniinaayt uubliis bareekna gaalka jarrabiyeet yhariw.

32 لَاكِيْن سِيْمُوْن، اَنِي َع اِيْمَاثُوْكَ اُنْكِرِي َع دَهَاي سِيْلِيْلُن۔ اَنِي َع دَهَاي تَشَاقِيْرِيْنَاي َع هَرِي اَرِي، اِرُوْتِك شَمَه»۔ اِد َع۔

32 Laakiin Siimoon, ani w'iimaanuuk ankiiree dehaay siileelan. Ani dehaay tut'agiireenaay har'ii aree, iraweek shama!» idi.

33 سِيْمُوْن، «وَاَنْكُوْنَاي۔ اَنِي َع بَرِيِيُوْكَ قِيْب اُوْسَجِن اِنْبِيِي َع دَهَايُوَه، قُوْدُوْكَ اِيَايِي َع دَهَايُوَه اَمَارُو»۔ اِد َع۔

33 Siimoon, «W'ankwanaay! Ani bariiyook geeb oosjin eebiyee dehaaywa, gwadook ayaayee dehaaywa amaaru.» idi.

34 يَسُوْا، «اَنِي َع اُنْدَهُوَكَه، بَرُسِي َع، لَهِيْت كِرُوْمَت اُوْجِيْكَ بَاْكَوْكَلَايِي، بَرُوْكَ مَهِي َع دُوْرَة «اَنِي َع كَاكْنَهُوَكَه» اِيَادَهِيْب تِيْدَنَه»۔ اِد َع۔

34 Yasuu'a, «Ani andihooka, Bitrusi, lhayt kiruumt uujiik baakuukillaayay, baruuk mhay doora <Ani kaakanhooka.> iyaadeheeb tindiya.» idi.

35 يَسُوْا اِيْجُو رِيَايِي َع دَهَاي، «بَرِيْكَنَه اَنِي َع مَهَلْقَايِيْت شَنْتَاوَه، اِيْبَابْتِيْت شَنْتَاوَه، قِيْدَانُوَه اَنُو فَيْسَنْتِيِيُوَكْنَه دُوْر، نَاْت هُن تِيْنَهْتَه؟» اِد َع۔ بَرَاه، «كِنَكِي َع» اِدِيْن۔

35 Yasuu'a ikwiriyaatayeeh dehaay, «Bareekna ani mhallagaayeet shantaawwa, iibaabteet shantaawwa, gidh'aatwa anu giigsaneeyookna door, naat han tishinhana?» idi. Baraah, «Kinki.» idiin.

36 یسوا، «لاکین اونتا مہلقاب، ترے ایبابتیت شنتہ ابریب یکسانتہ۔  
نات بابریب، ہلکاییکنتہ دلیبات باڈڈ ہای اہانتہ» ایدے۔

37 این داینہ اکتب دیابتیت، «بروہ ماقتک ایتودے» بیت بٹوہ انیب  
سہروئی کتابٹو، ولے آری سیک لیکتے بندے۔

38 اگوریاتی، «وانگوناہی۔ آن براہ ملو اہمباڈڈہ» ایدین۔ یسوا، «بلین  
مہابتہ» ایدے۔

### یسوا سیلانیہ

39 یسوا «سٹیون» ایتویدیپ اوریہ سوریتوس ایے۔ تگوریہ ہن قود  
ایین۔

40 بینتوئی اکتمنے دور، یسوا، «بتجریمینہ دہای سیلانیہ»  
ایدے۔

41 ملیہ یسوا باگورمیوہ باسیلانی دبلوت مسافہ ہیریریتہ۔

42 «باہو۔ ہریوئیک اون اوکاس قو ایتیب ٹلہتی ہویسے قیسا۔  
لاکین آنے اہریوئیک ٹونہ کتاگے، بروک ہریوئیک ٹونہ تکتے»  
ایدے۔

43 ملکتاپے بروہ اساجر، تیریتہ دہای لویہ۔  
44 یسوا ادهویت ہوی داتہ، وتیت اکران سیلانیہ۔ اودوف  
وایتفے اہویت تگوناہی ٹوتیب تگوتیت ایتا۔

45 ملیہ توسیلانیہ یکاییت، اگوریاتیہ دہای ایتہ۔ بریہ قذب  
دیرسہ آکای دوی رہیتہ۔

46 بریوہ دہای، «نان ہوی دوتینہ؟ تجریاتیب بتدینہ دہای  
یکانتہ، سیلانیہ» ایدے۔

### یسوا ایت تابوکے

47 یسوا ہدیڈے سقے مہینی ماقتے دہی یہوداس ایدنتہ تک،  
اگوریاتی ایتنا ملوی ملہی دہای لویان۔ بروہ یسواہی دہای سلام  
میادیپ سور ایے۔

48 یسوا یہوداسے دہای، «یہوداس، سلام اومیاد بروک وادمے  
اور ہای تیتیل ہن؟» ایدے۔

49 یسوا ایت اگوریاتی قتب ایفین تونہ تاکای تید اکتہ دور،  
«وانگوناہی۔ اہمباڈی گیسنی؟» ایدین۔

50 قال بریسوہ ہوی ایتیریتہ ہدایے کشیہ اہمباڈی ایتا، وانقول  
ایمکواہی ہوی افرأ۔

51 یسوا بریوہ دہای، «اونتا قندتہ» ایدیت، اکتے انقول  
شیشیتہوب اناہر۔

52 یسوا ایتیرے ہداوہ، اگواسناہی قوے قوادیقوہ، اودہیے  
ایقرماوہ، بلین بریوہ اہویکیت ایتانی دہای ہدیڈیہ۔ «نان ہوی ماق  
تکیت اہمباڈیوہ کولیاہوہ تیہنیت دہہ یکانتہ؟»

53 دیماہ اگواسناہی قویب قتیوکتہ ایفینک، اہمباہ ہن اہکایے  
کتینتہ۔ لاکین اون دوراکنایو، ٹینتے دورو» ایدے۔

36 Yasuu'a, «Laakiin oont'a mhallagaab, tari iibaabtiit  
shanta ibariib yaksaana! Naat baabariib,  
halakaayeezna dilibnaat b'adhadh haay ahaana!» idi.

37 Een d'iina aaktab diyaabayt, «Baruuh maagtak  
ittiyooodi.» Beet batuuh aneeb sehariwee kataabtu,  
willa aree sidik iikati tindi.

38 Ikwiriyaatay, «W'ankwanaay! Aan baraah malu  
imb'adhadha.» idiin. Yasuu'a, «Baliin mhaaba!» idi.

### Yasuu'a siileeliya

39 Yasuu'a «Saytuun» ittiyooodiib oorba suureetoos  
ibi. Tikwiriya han gwad ibeen.

40 Beentooy iktimni door, Yasuu'a,

«Bitjarrabamaynee dehaay siileelaana!» idi.

41 Malya Yasuu'a baakuuramaywa baasiileelay  
dabaloot masaafa hiireeriya.

42 «Baabu! Harriweek oon ookaas gw'itiib tulhanay  
hooyi giigsaa! Laakiin ani aharriweet tuuna kit'aki,  
baruuk harriweet tuuna tikati.» idi.

43 Malaktaayi barooh is'ikir, tibreetee dehaay lawiya.

44 Yasuu'a adehuuyt hooy daata, winneet akraat siileel  
siileeliya. Uduuf w'iitfafi ibooyiit thakwanaay  
tubuutiib thakwtiit iit'a.

45 Malya toosiileeltii yakiyaayt, ikwiriyaatayeeh  
dehaay eeya. Bareeh gadab deeyarsa akaay diwee  
rhiya.

46 Bareeyooh dehaay, «Naan hooy diwteena?  
Tijirbaatiib bitdhibaynee dehaay yakaana,  
siileelaana!» idi.

### Yasuu'it t'abuuki

47 Yasuu'a hadiidee sagi mhiinii maagti dehay  
Yahuudaas iidna tak, Ikwiriyaatay itamnaa malooyee  
milhee dehaay lawiyaan. Baruuh Yasuu'ii dehaay  
salaam miyaadiib suur ibi.

48 Yasuu'a Yahuudaasi dehaay, «Yahuudaas, salaam  
oomiyaad baruuk W'aadami Oor haay tintiil han?»  
idi.

49 Yasuu'iib ikwiriyaatay geeb iifiin toona t'akaay tiid  
ikanna door, «W'ankwanaay! Imb'adhdhii  
kayasnay?» idiin.

50 Gaal bareesoooh hooy ifagiiriya had'aayi kishiya  
umb'adhdhii ith'a, w'angwiil imiikwaay hooy ifir'a.

51 Yasuu'a bareeyooh dehaay, «Oont'a gadna!» idiit,  
utaki angwiil shiishiyanoob in'ir.

52 Yasuu'a ifagiiri had'aawwa, Ukwaasanaay gawi  
gw'aadeegaawwa, uudehayi eegrimaawwa, baliin  
bariyooh abuukiib eeyaanee dehaay hadiidiya.

«Naan hooy maag takiit imb'adhdhaabwa  
koolayaabwa tiyheeniit deha yaktaana?»

53 Diimaab Ukwaasanaay gawiib geebookna iifiyeek,  
imb'eeb han abkaayi kitteena. Laakiin uun  
dooraaknaayu, thibinti dooru.» idi.

## بترس یسوا کاکن ایدے

## Bitrus Yasuu'a kaakan idi

54 ملية يسوا يابكنيت، إقيرية هداي قو بنيتے هاي قيقيان- بين اودور بترس اكوياي امورام-

54 Malya Yasuu'a y'abikniit, ifagiiriya had'aay gaw beeti haay giigiyaan. Been oodoor Bitrus ikwayaay imooraam.

55 نايث قويب شيدھنته كؤل سا دھيے قيب اسأ.  
56 اوت كشييات برؤه رهتة- ملياب دايبب تشيبب هرا، «اون اوتك يسواي قيب ايفے» يدے-

55 N'eet gawiib shidhhana kwalal s'a dehayi geeb is'a.

57 لاكين بترس اتوے، «يا تكتي- ائے اون اوتك اوتك كاكن» ايدے-

56 Oot kishiyaat barooh rhita. Malyaab daayiib tishibibt har'i, «Uun uutak Yasuu'ii geeb iifi.» tidi.  
57 Laakiin Bitrus itwi, «Yaa takatay! Ani oon ootak ookna kaakan.» idi.

58 شلك دوره هراي تك ويز اقراررت، «برؤك هن بريسوه قالوة» ايدے- لاكين بترس، «ائے كاگے» ايدے-

58 Shalik doora har'ii tak weer igwaarirt, «Baruuk han bareesooh gaalwa.» idi. Laakiin Bitrus, «Ani kaaki!» idi.

59 فات ساتے هراي تك ويز اري اكراب بهلييے، «اون برؤه سيدك بريوه قيب ايفے- برؤهوه، بسووه، جليليه هدا بآبے» ايدے-

59 Gaat s'aati har'ii tak weer aree akraab bhaliyee, «Uun baruuh sidik bareeyooh geeb iifi. Baruuha, Yasuu'wa, Jaliileeh hiddaab y'aaba.» idi.

60 بترس، «برؤك تدييب اهلے ائے اکتينيب كيكين» ايدے- قي قال دور، اوجيك كوكلايے-

60 Bitrus, «Baruuk tindiyeeb ibhali ani akteenyeeb kiikeen.» idi. Gay gaal door, uujiik kuukillaayi.

61 وانگونه نكميايت بترس ايسيب. بترس اون اودور وانگونه ايديب اهلے، «لهيت فجر اوجيك باكوكلاي، مهيت دوره كاكنهوكے» ايديب شايته-

61 W'ankwana nakamiyaayt Bitrus ishbib. Bitrus oon oodoor W'ankwana iideeb ibhali, «Lhayt fajir uujiik baakuukillaayay, mhayt doora kaakanhooka.» iyaadeheeb tindiya.» iideeb sh'ya.

62 بزآب افرات وثيت واويته-

62 Barraab ifir'at winneet waawiya.

63 اندة يسوا ايفواد برؤه هاي كشيانته ائبانته-

63 Aanda Yasuu'a iigw'ad barooh haay kashiyaana ithab'ana.

64 ايفواد بهكورنييت برؤه سكانيين، «سوياهون، او ائاهوكے؟» ايدنته-

64 Eegw'ad yhakwirniit barooh sakanaayiin, «Sooyahoon, aaw ith'ahooka?» iidna.

65 برؤه نيويين قودة ماقوراب هوي داين-

65 Barooh neewiin gwida maagwaraab hooy daayiin.

66 اوميا تريبب ايقيرية ايقرماوة، وهقے كنانيقاوة ايكين ايمراينيت، يسوا اون امجلسے سوري هاي ايان-

66 Oomb'i tarabeeb ifagiiriya eegrimaawwa, whaggi kanaaniigaawwa iiktiin immarraayniit, Yasuu'a oon umajlisi suuri haay eeyaan.

67 يسواي دهاي، «سوياهون- برؤك امسيهوه؟» ادين- يسوا، «اين انديوكنة براكنة كامنتانهيب،

67 Yasuu'ii dehaay, «Sooyahoon! Baruuk Umasiihwa?» idiin. Yasuu'a, «Een andiyuukna baraaakna ka'amantaanaheeb,

68 سكاتانيوكنة هن كسوتانهيب-

68 sakanaayaniyuukna han kasootaanheeb.

69 لاكين اون امسيني وادمے اور اكواسناي وكراناي قود اميفود ايستا ائدے» ايدے-

69 Laakiin oon amseenee W'aadami Oor Ukwaasanaay W'akraanaay gwad umiigwad iist'a indi.» idi.

70 براه مسيے، «افلاي برؤك اكواسناي اوروه؟» ادين- يسوا، «براكنته تيدنيو» ايدے-

70 Baraah masi, «Aflaay baruuk Ukwaasanaay oorwa?» idiin. Yasuu'a, «Baraakna tiyadnee bu.» idi.

71 براه، «ابييه ايفيسوه اندينيك، نان هوي ورے بادھے نهرو؟» ادين-

71 Baraah, «Abiyeeh uyafiisooch indiyeeek, naan hooy wari baadehi nhariw?» idiin.